

JOANNIS PAULI II
SUMMI PONTIFICIS



EPISTULA APOSTOLICA
SALVIFICI DOLORIS
AD TOTIUS CATHOLICÆ ECCLESIÆ
EPISCOPOS, SACERDOTES, RELIGIOSAS
FAMILIAS ET FIDELES, DE CHRISTIANA
DOLORIS HUMANI SIGNIFICATIONE.

I

1. SALVIFICI DOLORIS virtutem declarans, ait Sanctus Paulus Apostolus: “Adimpleo ea, quæ desunt passionum Christi, in carne mea pro corpore ejus, quod est Ecclesia”.¹

Nimirum verba hæc videntur finem facere longissimi itineris per dolores, qui hominum historiæ quodammodo semper interseruntur, ac verbo Dei clarescunt. Hæc sane Pauli verba pæne tanti pretii sunt, quanti est noviter inventa res, comitata quidem lætitia. Quapropter hæc scribit Apostolus: “Nunc gaudeo in passionibus pro vobis”.² Manat autem lætitia ex intellecta significatione doloris, tantaque hæc rerum perceptio, tametsi beatissimum Paulum Tarsensem primo afficit, qui talia scribit, tamen ad ceteros etiam pertinet. Apostolus enim, quod ipse mente vidit, idcirco cum aliis communicat gaudens quod eo inde omnes adjuvantur – sicut ipse adjutus est – ad significationem doloris salvifici penitus intellegendam.

2. Doloris argumentum – sub hoc præcipue salvifico aspectu – quam aptissime huic sacro Redemptionis Anno interici videtur, ab Ecclesia extra ordinem jubilæorum celebrato; quæ res quidem movet ad illud argumentum, hac ipsa data

¹ *Col.* 1, 24.

² *Col.* 1, 24.

opportunitate, acri studio investigandum. Sed, etiamsi Anni Sacri rationem non habeamus, ea tamen est de humano dolore quæstio ut cunctos homines in omni eorum ordine tangat, quavis longitudine ac latitudine terræ, quasi cum homine quodammodo ærumnæ illæ in mundo natæ sint; atque id efficit ut huius tractatio argumenti sit continenter instauranda. Quamquam enim Paulus scribit in Epistula ad Romanos: “Scimus enim quod omnis creatura congemiscit et comparturit usque adhuc”,³ et passim etiam animalia circa nos dolore laborare videmus, nihilominus, quod “doloris” nomine exprimitur, *humana natura* singulari ratione *proprium esse* videtur. Est enim id tam altum, quam ipse homo, cum insitam homini quadamtenus altitudinem indicet, ac suo modo eam excedat. Dolor ad ea pertinere videtur, quibus homo res transcendit; est enim ex illis rebus, quibus homo aliqua ratione “destinatur” ut se ipsum superet, arcana scilicet et occulta ratione ad hoc vocatur.

3. Quod si propositum doloris argumentum peculiariter hoc sacro Redemptionis Anno enucleandum est, id ob eam causam potissimum fit quod *Redemptio per Crucem Christi* facta est, hoc est *per ejus cruciatus*. Simul vero hoc anno Redemptionis veritas illa venit in mentem, quæ Litteris Encyclicis “Redemptor Hominis” continetur: “Omnem hominem in Christo esse

³ *Rom.* 8, 22.

Ecclesiae viam”.⁴ Dici potest homo tunc peculiari modo fieri via Ecclesiae, cum dolor ejus vitam ingreditur; quod evenit, ut patet, variis vitae temporibus, diversa ratione efficitur, varias induit rationes; semper tamen dolor, qualiscumque ejus est forma, videtur, ut vere est, *a vita terrena hominis separari non posse*.

Explorato igitur hominem in hac terrena vita, hoc vel illo modo, per ærumnas ambulare, Ecclesia oportet omni tempore – ac quidem maximopere fortasse Redemptionis Anno – hoc ipso tramite homini occurrat; etenim Ecclesia, cum ex arcano Redemptionis mysterio in Cruce Christi manaverit, *obviam* ire oportet studeat homini præsertim doloribus obnoxio, nam in illo occurso vere homo “via Ecclesiae fit”; et hæc quidem est omnino potior inter vias.

4. Ex his autem vim omnem habet præsens de dolore consideratio, ipso Sacro Redemptionis Anno volvente: consideratio videlicet doloris. Dolor enim humanus ad *compassionem* inclinatur, tum etiam *reverentiam* parit, et suo modo *timorem* affert: latet enim in eo magnitudo peculiaris mysterii. Hæc cujusvis humani doloris reverentia singularis primum locum obtineat oportet in iis quæ, maximæ *cordis necessitati* et etiam *fidei jussui* parentes, mox dicemus. In doloris tractatione hæc duo argumenta singularem in modum confluere atque conjungi videntur inter se: illud quidem

⁴ Cfr. IOANNIS PAULI PP. II *Redemptor Hominis*, 14. 18. 21. 22.

jubendo ut timorem vincamus; hoc vero (sic ut ante v. gr. vidimus a Sancto Paulo definitum) materiam præbendo, ob quam et per quam in homine illud audemus attingere, quod nullo pacto in quovis homine attingi posse videtur; nam patiens homo arcanum quid induit idemque inviolabile.

II

5. Dolor quamquam, si eum subjective intueamur, quatenus est res personalis et in intima hominis mente, concreta neque iterabili, inhabitat, neque aut definiri aut transferri posse videtur, fortasse nihil aliud tamen est, quod, si ejus “*realitas obiectiva*” consideretur, magis tractari, reputari, ac ceu veram quæstionem intellegi oporteat; circa quam ponuntur interrogationes, ad naturam pertinentes, et responsiones quæruntur. Neque, ut plane intellegi potest, agitur hic solum de describendo dolore, cum, præter meram definitionem, sint et alia rei judicandæ principia, quibus utendum, si quidem humani doloris ambitum penitus mente comprehendere volumus.

Constat *medicinam, ut scientiam et artem curandi*, in vasta humani doloris provincia ea cognoscere, *quæ notissima sunt*: illa videlicet, quæ sive accuratiore inquisitione comprobari possunt, sive in genere suo potius compensantur methodis curandi, quibus “contra fit” (id est therapia). Hæc tamen tantummodo pars est; dolor enim

humanus, sicut multo *latius patet*, ita multo magis varius ac multiplex est: homo enim diversimode patitur, quod ars medica non semper attingit, ne perfectissimis quidem medendi rationibus. Id autem idcirco fit quod dolor humanus etiam latius patet quam morbus; est implicatior, idemque altius in ipsa humanitate radices agit. Hanc rem facilius assequemur, si dolorem physicum a morali distinguamus. Quæ sane distinctio in duplici hominis parte innititur, denotans elementum corporeum et spiritale ut proximum vel rectissimum subjectum doloris. Quamquam verba “passionis” ac “doloris” ut aliquatenus idem sonantia accipi possunt, *passio physica* habetur, cum quovis modo “corpus dolet”, *passio* vero *moralis* est “dolor animi”. Agitur enim de dolore indolis spiritalis, non solum de psychica ratione doloris, quæ sive morali sive physicæ ægritudini adhæret. Jamvero amplitudo ac varietas ægritudinis moralis absque dubitatione haud minores sunt quam amplitudo et varietas physicæ passionis; tamen illa pæne minus agnosci ac minus per therapiam curari posse videtur.

6. Sacræ autem Litteræ sunt quasi magnus *liber de dolore*. E quarum Veteris Testamenti Libris exempla nonnulla condicionum excerpere placet, in quibus singulariter humani nota doloris, maxime moralis, elucet. Deprehendimus vero ibi

dolorem in mortis discrimine,⁵ in morte filiorum,⁶ potissimum si de primogenito eodemque unico agitur;⁷ item in prolis privatione,⁸ in patriæ desiderio,⁹ in hominum persecutione atque inimicitia,¹⁰ in contumelia ac derisione eorum qui adversa patiuntur,¹¹ in solitudine ac desertione;¹² quin etiam in conscientiae morsibus,¹³ in difficultate percipiendi cur mali homines prosperentur, justi vero vexentur,¹⁴ in fallacia insuper et ingratitude

⁵ Quod Ezechias subiit (cfr. *Is.* 38, 1-3).

⁶ Sic ut Agar timuit (cfr. *Gen.* 15, 16), Iacob mente finxit (cfr. *Gen.* 37, 33-35), David expertus est (cfr. *2 Sam.* 19, 1).

⁷ Id Anna metuit, Tobiae mater (cfr. *Tob.* 10, 1-7; cfr. edam *Ier.* 6, 26; *Am.* 8, 10; *Zac.* 12, 10).

⁸ Talis fuit Abrahæ (cfr. *Gen.* 15, 2), Rachelis (cfr. *Gen.* 30, 1), Annæ, Samuelis matris (cfr. *1 Sam.* 1, 6-10), temptatio.

⁹ Ut exsulum Babylonica lamentatio (cfr. *Ps.* 137 [136]).

¹⁰ Quibus v. gr. affectus est Psaltes (cfr. *Ps.* 22 [21], 17-21), Jeremias (cfr. *Ier.* 18, 18).

¹¹ Sic ut accidit Iob (cfr. *Iob* 19, 18; 30, 1. 9), nonnullis Psaltribus (cfr. *Ps.* 22 [21], 7-9; *Ps.* 42 [41], 11; *Ps.* 44 [43], 16-17), Jeremiæ (cfr. *Ier.* 20, 7), Servo patienti (cfr. *Is.* 53, 3).

¹² Quibus iterum oppressi sunt nonnulli Psaltes (cfr. *Ps.* 22 [21], 2-3; *Ps.* 31 [30], 13; *Ps.* 38 [37], 12; *Ps.* 88 [87], 9. 19); Jeremias (cfr. *Ier.* 15, 17) atque Servus patiens (cfr. *Is.* 53, 3).

¹³ His Psaltes (*Ps.* 51 [50], 5), testes ærumnarum Servi (cfr. *Is.* 53, 3-6) et Zacharias Propheta (cfr. *Zac.* 12, 10) confusi sunt.

¹⁴ Talia passi sunt tum Psaltes (cfr. *Ps.* 73 [72], 3-14), tum Qoet (cfr. *Qo.* 4, 1-3).

amicorum atque propinquorum;¹⁵ denique in propriæ nationis acerbitatibus.¹⁶

Antiquum Testamentum ad hominem, quasi ad “*compositum*” *physicum-psychicum* respiciens, “*morales*” animi ægritudines persæpe cum dolore quarundam corporis partium conjungit: cum ossium¹⁷ videlicet, cum renum,¹⁸ iecoris,¹⁹ viscerum,²⁰ cordis.²¹ Non est enim infitiandum *morales* passiones in partem “*physicam*” seu somaticam redundare, atque ad totam sæpe hominis extendi compaginem.

7. Ut subjecta docent exempla, Sacra Biblia longum casuum indicem præbent, in quibus homo multipliciter afficitur dolore. Hic tamen index, varius quidem, certe non omnia exhaurit, quæ *liber historiæ hominis* (qui potius est “*liber non scriptus*”) de dolore et protulit et constanter profert, maxime vero *liber historiæ* gene is humani, si in uniuscujusque hominis casus inspiciatur.

¹⁵ Hæc perpassi sunt sive Job (cfr. *Job* 19, 19), sive Psaltes nonnulli (cfr. *Ps.* 41 [40], 10; *Ps.* 55 [54], 13-15), sive Jeremias (cfr. *Ier.* 20, 10); Siracides vero de hac miseria meditatur (cfr. *Sir.* 37, 1-6).

¹⁶ Præter plures *Lamentationum* locos, cfr. psalmistarum questus (cfr. *Ps.* 44 [43], 10-17; *Ps.* 77 [76], 3-11; *Ps.* 79 [78], 11; *Ps.* 89 [88], 51), prophetarum (cfr. *Is.* 22, 4; *Ier.* 4, 8; 13, 17; 14, 17-18; *Ez.* 9, 8; 21, 11-12). Cfr. etiam Azariæ orationes (cfr. *Dan.* 3, 31-40), et Danielis (cfr. *Dan.* 9, 16-19).

¹⁷ Cfr. e. gr. *Is.* 38, 13; *Ier.* 23, 9; *Ps.* 31 [30], 10-11; *Ps.* 42 [41], 10-11.

¹⁸ Cfr. *Ps.* 73 [72], 21; *Iob* 16, 13; *Lam.* 3, 13.

¹⁹ Cfr. *Lam.* 2, 11.

²⁰ Cfr. *Is.* 16, 11; *Ier.* 4, 19; *Iob* 30, 27; *Lam.* 1, 20.

²¹ Cfr. 1 *Sam.* 1, 8; *Ier.* 4, 19; 8, 18; *Lam.* 1, 20-22; *Ps.* 38 [37], 9, 11.

Affirmari autem licet hominem tum pati, cum *malum quodlibet* experiatur. Secundum Veteris Testamenti sermonem ratio inter dolorem et malum evidenter est talis ut hæc idem valeant. In ejus enim sermone deerat verbum peculiare, quod vim “doloris” exprimeret. Qua de causa, quidquid homo patitur, ibi “malum” appellatur.²² Solum lingua Græca, atque secundum eam Novum Testamentum (et antiquæ versiones Græcæ Veteris Testamenti), verbum adhibet, cujus hic est intellectus: afficior aliqua re, sentio, doleo; ideoque, per illud verbum, malum (obiectivum) iam non idem sonat ac dolor, sed condicionem significat, in qua homo malum experitur idque experiendo patitur dolorem. Qui dolor duplicem indolem præ se fert, id est *indolem activam et passivam* (a “patiendo”); quin immo, cum homo ipse sibi efficit dolorem, cum ejus est auctor, hic dolor est quiddam passivum secundum essentiam suam metaphysicam.

Neque tamen inde consequitur animi ægritudinem, psychologicè consideratam, nullam

²² Meminisse juvat radicem Hebraicam *r'* designare in universum quod malum est et bono oppositum (*tôb*), nullamque admittere distinctionem inter sensum physicum, psychicum, ethicum. Invenitur etiam in substantiva forma *na'* et *nâ'â*, significante sine discrimine sive quod malum est in se, sive malam actionem, sive etiam male agentem. In formis verbalibus præter simplicem illam formam (*gal*), quæ, varia quidem ratione, designat « aliquid malum esse », invenitur etiam forma reflexiva-passiva (*niphâl*), id est « malum subire », « maio corripì », atque forma causativa (*hiphil*), « malum inferre » seu « irrogare » alicui. Cum autem careat lingua Hebraica verbo Græcæ formæ respondente, idcirco fortasse verbum id raro in versione a Septuaginta occurrit.

in se “*peculiarem activitatem*” habere: illam, dicimus, multiplicem et subiective distinctam “activitatem” doloris, tristitiæ, dejectæ spei, abjectionis et etiam desperationis, prout vehementior leniorve affectio illa irruat, aut altiores radices extenderit, aut, per obliquum, talis vel talis fuerit tota structura ejus qui patitur, et illius sentiendi singularis facultas. Qua re, in omni ægritudinis psychologica forma semper alicujus *mali patientia est*, qua homo dolet.

Non ergo mirum, si ægritudo ipsa ad interrogationem de natura mali conducit: quid videlicet est malum?

Hæc sane interrogatio videtur quodammodo ab argumento passionis sejungi non posse. Responsio quidem christiana differt ab ea quæ quibusdam traditionibus culturalibus et religiosis datur, secundum quas existentia humana putatur esse quoddam malum, a quo quis se liberet oporteat. Christiana vero religio essentielle *bonum existentia* profitetur necnon bonum eorum quæ sunt, et bonitatem Creatoris atque bonum creaturarum declarat. Homo propter malum dolore afficitur, quod est quædam privatio, depravatio boni. Dicas hominem idcirco pati quod bonum aliquod non participat, a quo aliquomodo excluditur aut quo se ipse privavit. Atque tum maxime dolet, cum – in sueto rerum cursu – huius boni particeps esse “deberet”, sed reapse non est.

Qua re, secundum christianam cogitandi rationem veritas doloris per malum explanatur, quod semper aliqua ratione ad bonum refertur.

8. Humanus igitur dolor per se habendus est quasi quidam peculiaris “*ambitus*”, qui una cum homine existit, qui in eo apparet et evanescit, interdum autem non evanescit, sed in illo solidatur et insidet. Hic doloris ambitus, multos, immo plurimos divisim afficiens, est quasi *quiddam dispersum*. Unusquisque homo personali suo dolore est non solum parva pars illius “ambitus”, sed idem “ambitus” est in eo quiddam finitum, quod nullo modo repeti potest. Hac tamen cum re est etiam alia ratio inter homines intercedens et socialis. Ambitus doloris pæne *propriam sibi compaginem* efficit. Homines enim dolentes inter se similes redduntur per analogiam conditionis, in qua versantur, per sortis experimentum aut per benevolentiae et sollicitudinis sitim et forsitan potissimum per indesinentem interrogationem de ægritudinis significatione. Quam ob rem, quamquam doloris ambitus est quiddam dispersum, simul tamen ad *communionem et necessitudinem* singulariter provocat. Quam provocationem etiam in præsentì commentatione præ oculis habere studebimus.

Doloris autem ambitum considerantes, tum secundum sensum ejus personalem tum collegialem, deprehendimus profecto illum quibusdam temporibus vitæque humanæ

momentis præsertim quasi *densari*, ut ex. gr. in naturalibus calamitatibus, contagiis, ruinis et eversionibus, variis cladibus socialibus: ut sunt ingrata messis, cum illaque conjuncta – præterquam ex aliis causis manans – acerba tristisque fames.

Bellum tandem versetur ante oculos mentis. De eo peculiariter loquimur. De recentioribus duobus bellis, quæ per orbem sævierunt, loqui placet, quorum alterum multo uberiores messem tulit mortuorum atque ingentiores humanorum dolorum struxit acervum. In vicem, secunda sæculi nostri pars *pæne pro erroribus atque transgressionibus* civilis cultus huius ætatis hominum tam horrida secumfert semina belli atomici ut, illud temporis spatium considerantes, facere nequeamus quin simul etiam de *incomparabili dolorum cumulo* cogitemus, quo fieri possit ut genus humanum se ipsum interimat. Qua re ambitus ille doloris, qui certo in unoquoque homine ut in subjecto insidet, hac nostra ætate fortasse magis quam præteritis temporibus in “peculiarem dolorem mundi” vertere videtur. Mundi dicimus, qui, ut numquam alias progressu opera hominis commutatus est, sic simul in summum est etiam discrimen adductus, ut numquam antea, propter hominis errores et noxas.

III

9. In quolibet dolore, quem unus quisvis homo patitur, pariterque in universo doloris ambitu, necessario hæc inest *quæstio: Cur?* Est quidem interrogatio de causa, de ratione, et simul de fine (*ad quid?*) et, ad summam, quæstio de sensu; quæ non solum cum humano dolore conjungitur, sed videtur prorsus definire humanum, quod in ipso homine continetur, nimirum id, quo dolor est proprie humanus.

Manifestum est dolorem, præsertim corporis, longe lateque afficere animalia; sed solus homo, dolore percussus, animadvertit se pati et causam exquiri; et modo humaniter etiam acerbiorè patitur, nisi probabile accipit responsum. Hæc est *quæstio difficilis*, sicut alia simillima, quæ ad malum attinet. Quare est malum? Quare malum in mundo? Cum ita percontamur, quodam saltem modo etiam de dolore interrogamus.

Utraque quæstio ardua est, cum eam homo homini ponit, homines hominibus; sed etiam cum homo eam *Deo proponit*. Homo enim non ex mundo hæc requirit, quamvis sæpe a mundo doleat, sed ex Deo, utpote mundi Creatore et Domino. Probe notum est in hac interrogatione homines non solum eo pervenire ut multimode destituantur consiliis et cum Deo contendant, verum etiam ut *ipsum Deum audeant negare*. Si enim mundi existentia quasi obtutum mentis humanæ ad Dei existentiam et sapientiam et potentiam et magnificentiam aperit, malum contra et dolor

hanc imaginem, funditus quandoque, obscurare videntur, et hoc magis in cotidianis gravibus casibus tot dolorum sine culpa totque culparum sine pœna congruenti. Hoc ergo indicat – fortasse magis quam quidquam aliud – quanti momenti sit *quæstio de significatione doloris*, et quo acumine oporteat et eandem quæstionem et responsum, quod dari possit, tractare.

10. De hac re homo potest Deum interrogare animo permoto et mente stupore et anxietudine repleta; Deus autem quæstionem exspectat et audit, sicut in Revelatione Veteris Testamenti videmus. Liber Job hanc quæstionem acerrime exprimit.

Nota est huius viri justii historia, qui culpa vacans innumeris doloribus temptatur. Bona, filios et filias amittit et ad ultimum ipse gravi morbo corripitur. Dum in hac acerbissima condicione versatur, adeunt ad domum ejus tres inveterati familiares, qui – vario quisque sermone – conantur ei persuadere *ipsum aliquod grave facinus admisisse*, si tam multiplicibus et acerbis doloribus afficiatur. Dolor namque – ii dicunt – ingruit semper in hominem solum ut pœna ob aliquod crimen; a Deo prorsus justo infertur, ejusque causa in ordine justitiæ continetur. Dicitur veteres illos amicos velle non solum Iob *convincere* malum moraliter justum esse, sed niti quodammodo *defendere* coram se ipsis doloris sensum morale. Ii putant dolorem nonnisi

tamquam pœnam peccati intellegi posse, solummodo ergo in provincia justitiæ Dei, qui bonum bono et malum malo rependat.

Ii repetunt hoc in casu doctrinam ab aliis scriptis Veteris Testamenti, quæ ostendunt pœnam a Deo propter peccata illatam. Deus enim Revelationis est *Legislator et judex*, quo modo nulla alia humana potestas. Deus Revelationis enim est imprimis *Creator*, a quo una cum existentia provenit essentielle creationis bonum. Quocirca etiam conscia et libera violatio huius boni ab homine commissa non tantum est transgressio legis, verum etiam iniuria Deo illata, qui est primus Legis Lator. Ejusmodi transgressio habet proprietatem peccati, secundum significationem veram, id est biblicam et theologiam huius vocis. *Malo morali peccati consentanea est pœna*, quæ ordinem moralem tuetur juxta eandem significationem transcendentem, ex qua idem ordo est a voluntate Creatoris et supremi Legislatoris constitutus. Hinc etiam una ex fundamentalibus veritatibus fidei religiosæ, item in Revelatione innixa, manet, quæ affirmat Deum esse judicem justum, qui bonum remuneretur et malum puniat: Tu, Domine, “justus es in omnibus, quæ fecisti nobis, et universa opera tua vera, et viæ tuæ rectæ, et omnia judicia tua veritas. judicia enim vera fecisti juxta omnia, quæ induxisti super nos... in veritate

et in iudicio induxisti omnia hæc propter peccata nostra”.²³

Opinio amicorum Job ostendit persuasionem, quæ sæpe invenitur etiam in conscientia morali generis humani: ordine morali obiectivo postulari pœnam ob transgressionem, ob peccatum obque culpam. Exinde dolor apparet “malum jure comprobatum”. Persuasio eorum qui dolorem ut pœnam peccati explanant, ordine justitiæ fulcitur, quod opinioni respondet, a quodam prolata, cui cum Job est amicitia: “Quin potius vidi eos, qui operantur iniquitatem et seminant dolores et metunt eos”.²⁴

11. Sed Job negat verum esse hoc principium, quod iudicet dolorem esse pœnam peccati. Quod quidem is facit, sua ipsius opinione innixus, siquidem conscius est se non meruisse ejusmodi pœnam, immo bonum declarat in vita patratum. Deus ipse ad ultimum amicos Job reprehendit accusationum et profitetur Job non esse reum. Ejus passio passio est innocentis; quæ recipienda est ut mysterium, quod homo ingenio suo penitus perspicere non valet.

Liber Job non lædit fundamenta ordinis moralis transcendentis, in justitia positi, qualia tota Revelatio in Vetere et Novo Testamento

²³ *Dan.* 3, 27 s.; cfr. *Ps.* 17 [18], 10; *Ps.* 36 [35], 7; *Ps.* 48 [47], 12; *Ps.* 51 [50], 6; *Ps.* 99 [98], 4; *Ps.* 119 [118], 75; *Mal.* 3, 16-21; *Matth.* 20, 16; *Marc.* 10, 31; *Luc.* 17, 34; *Io.* 5, 30; *Rom.* 2, 2.

²⁴ *Iob* 4, 8.

proponit. Sed simul hic Liber firmissime admonet huius ordinis principia non posse adhiberi exclusoria et levi ratione. Si verum est dolori sensum inesse ut pœnæ, quando hæc culpæ jungitur, verum contra non est *quemlibet dolorem ex culpa oriri et proprietatem habere pœnæ*. justus Job ejus rei peculiari documento est in Vetere Testamento. Revelatio, quæ est ipsius Dei Verbum, apertissime quæstionem doloris viri innocentis proponit, doloris sine culpa. Job non est punitus; deerant enim causæ cur ei pœna irrogaretur, quamquam est durissime pertemptatus. Ex Libri exordio patet Deum permisisse hoc viri experimentum Satana incitante. Hic namque coram Domino justitiam Job in controversiam adduxit: “Numquid Job frustra timet Deum? ... operibus manuum ejus benedixisti, et possessio ejus crevit in terra? Sed extende paululum manum tuam et tange cuncta, quæ possidet, nisi in faciem benedixerit tibi”.²⁵ Si Dominus consentit Iob dolore temptari, id facit ut *illius justitiam demonstret*. Dolor experimenti indolem habet.

Liber Job non exhaurit hanc materiam in Revelatione. Is enim quodammodo passionem Christi prænuntiat. Sed vel solus est *sufficiens argumentum*, quo responsio ad quæstionem de significatione doloris non conectatur sine aliqua exceptione cum ordine morali, qui in sola justitia est positus. Si hæc responsio habet

²⁵ *Iob* 1, 9-11.

fundamentalem et transcendentem rationem et vim, pariter videtur non solum minus probari posse in casibus similibus dolori Job, sed etiam ac quidem potissimum comprimere et extenuare *notionem justitiæ*, quam in Revelatione invenimus.

12. Liber Job “acri” modo ponit “causam” doloris, ostendit etiam innocentem pati, sed quæstionem nondum dissolvit.

Animadvertimus autem iam quandam Veteris Testamenti rationem inclinationemque, unde sententia, ex qua dolor solum ut pœna peccati possit explicari, exsuperatur, quatenus simul efficacia doloris ad educandum in lumine ponitur. In doloribus ergo, quibus populus electus a Deo afficitur, incitamentum continetur ejus misericordiæ, quæ corrigit ut ad conversionem perducatur: “Illæ pœnæ non ad interitum sed ad correptionem sunt generis nostri”.²⁶

Ita affirmatur ratio personalis pœnæ; juxta quam vis inest in pœna non solum quia ipsum malum obiectivum transgressionis alio malo rependit, sed quia imprimis facultatem dat restaurandi bonum in eo qui patitur.

Hæc doloris facies est summi momenti et in tota Revelatione Veteris et præsertim Novi Testamenti altissime insidet. Dolor conducere debet *conversioni*, id est *restitutioni* boni in homine, qui potest divinam misericordiam agnoscere in hac ad pænitentiam hortatione. Pænitiæ enim

²⁶ Cfr. 2 Macc. 6, 12.

propositum est ut malum vincatur, quod multiformiter in homine latet, et bonum firmetur tum in ipso homine, tum in necessitudine cum aliis, maxime cum Deo.

13. Sed ut verum responsum percipiamus, interrogationi dandum ad “causam” doloris pertinenti, respicere debemus revelationem divini amoris, ultimi fontis sensus rerum omnium, quæ sunt. Amor est etiam copiosissimus fons significationis doloris, qui semper mysterium manet, cum sciamus nostras explanationes non sufficere et impares esse. Christus nos in mysterium introducit et efficit ut “causam” doloris reperiamus, prout apti sumus ad comprehendendam divini amoris sublimitatem.

Ut altam significationem doloris, Verbum a Deo revelatum secuti, iterum reperiamus, oportet animus noster subjecto humano pateat, ratione ducta multiplicium ejus facultatum. Imprimis vero accipere oportet lumen Revelationis, non solum quatenus ea transcendentalis ordo justitiæ declaratur, sed etiam quatenus idem lumen hunc ordinem Amore collustrat, qui est omnium, quæ sunt, fons certus atque supremus. Amor est etiam fons plenissimus, cujus ope interrogationi de significatione doloris respondeatur. Quæ quidem responsio a Deo homini est data ipsa Cruce Iesu Christi.

IV

14. “Sic enim dilexit Deus mundum, ut Filium suum unigenitum daret, ut omnis, qui credit in eum, non pereat, sed habeat vitam æternam”.²⁷ Hæc verba a Christo pronuntiata in colloquio cum Nicodemo inducunt nos in medium quasi centrum *actionis salvificæ Dei*. Declarant etiam ipsam essentiam soteriologiæ christianæ, id est theologiæ salutis. Salus autem significat liberationem a malo ideoque arcte conjungitur cum quæstione doloris. Secundum verba Nicodemo dicta Deus dat Filium suum “mundo” ut hominem a malo liberet, quod in se continet extremam atque absolutam doloris rationem. Eodem quidem tempore ipsa *vox “dandi” (“ut daret”)* indicat hanc liberationem perficiendam Filio unigenito esse per proprium ejus dolorem. Qua in re amor manifestatur, infinitus nimirum amor tum Filii huius unigeniti tum Patris, qui huius rei causa “dat” Filium suum. Hic est amor erga hominem, amor in “mundum”: hic est amor salvificus.

Ingredimur hic prorsus novam rationem argumenti nostri: quæ res ante mentis oculos est nobis dilucide ponenda in communi nostra consideratione argumenti nostri. Hæc enim ratio alia est atque illa quæ statuebat et certo modo circumscribebat inquisitionem in doloris significationem ipsis justitiæ finibus. Hæc est *ratio Redemptionis*, quam sermo Job, viri justî, iam in

²⁷ *Io.* 3, 16.

Vetere Testamento, saltem secundum Vulgatam Editionem, prænuntiare videtur: “Scio enim quod redemptor meus vivit et in novissimo... videbo Deum...”.²⁸ Dum enim cogitatio nostra adhuc ante omnia et quodam modo solum in dolorem secundum multiplicem ejus formam temporalem (cujus modi sunt ipsi justī Job dolores) est directa, tamen verba modo allata ex Iesu colloquutione cum Nicodemo respiciunt *dolorem pro significatione ejus principali ac decretoria*. Namque Deus dat unigenitum suum ut homo “non pereat”; ac vis ejusdem locutionis “non pereat” definitur subtilius dictis sequentibus: “sed habeat vitam æternam”.

Etenim tum “moritur” homo, cum “vitam æternam amittit”. Non solus igitur dolor temporalis, quivis dolor opponitur saluti, sed dolor certus et immutabilis: amissio videlicet vitæ æternæ, reiectio a Deo facta, damnatio. Filius unigenitus datus est hominibus ut defenderet imprimis hominem ab hoc malo, a *dolore certo et immutabili*. Ex munere ergo suo salvifico ille attingere debet dolorem in ipsis ejus radicibus transcendentalibus, unde progreditur dolor per historiam hominum. Tales autem transcendentales doloris radices defiguntur in peccato ac morte: subjacent enim illæ amissioni vitæ æternæ In hoc igitur consistit missio Filii unigeniti ut *peccatum vincat et mortem*. Obœdientia

²⁸ *Iob* 19, 25-26.

quidem sua usque ad mortem is peccatum mortemque resurrectione sua devincit.

15. Cum vero Christus missione sua dicitur tangere malum ipsis in ejus radicibus, cogitamus non tantum malum ac dolorem certum et immutabilem, eschatologicum (ut homo “non pereat, sed habeat vitam æternam”), sed etiam – saltem obliquo modo – *malum ac dolorem* secundum eorum *rationem temporalem et historicam*. Nam malum cum peccato et morte cohæret. Et quamvis magna cum prudentia judicandus sit hominis dolor veluti consectorium peccatorum concretorum (hoc ipsum suadet justus Job exemplum), non tamen sejungi ipse potest a peccato originum, ab eo videlicet, quod a Sancto Joanne appellatum est “peccatum mundi”,²⁹ *a statu peccatorio* actuum personalium processuumque socialium in historia hominis. Quamquam haud licet huc adhibere regulam arctam directæ conjunctionis (quemadmodum tres Job amici fecerunt), nihilominus non licet ab illo iudicio discedere, ex quo hominum dolores e multiplici implicatione peccati manant.

Similiter accidit, cum de *morte* agitur. Sæpius exspectatur ea etiam uti liberatio ab huius vitæ doloribus. Simul autem præterire neminem potest eam efficere quasi extremam complexionem ipsius exitiosi operis dolorum sive in corporis compage sive in anima. Ante omnia autem mors

²⁹ 1, 29.

secum infert *disjunctionem* totius personalitatis psychicae-physicae hominis. Anima remanet subsistitque a corpore segregata; at corpus progredienti gradatim dissolutioni subicitur secundum verba Domini Dei, quae prolata sunt post peccatum ab homine admissum in historiae ejus terrestriis initiis: “Pulvis es et in pulverem reverteris”.³⁰ Quapropter, quantumvis mors non sit dolor secundum temporalem sensum verbi, quantumvis reperiatur *quadamtenus ultra omnes cruciatus*, simul tamen malum, quod in ea homo experitur, indolem praese fert rei alicujus extremae cunctaque pervadentis. Opere salvifico suo Filius unigenitus a peccato morteque hominem liberat. Imprimis ex hominum historia *expungit peccati dominatum*, qui impellente spiritu maligno egit radices iam inde a peccato originali, atque homini facultatem tribuit in gratia sanctificante vivendi. Post victoriam autem de peccato aufert ipse dominationem quoque *mortis*, dum resurrectione sua viam futurae corporum resurrectioni pandit. Haec et illa pernecessariae sunt condiciones ipsius “vitae aeternae”, immutabilis scilicet beatitatis hominis cum Deo conjuncti; hoc nempe salvatis significat dolorem in prospectu eschatologico penitus esse extinctum.

E salvifico opere Christi consequitur ut homo in terris *cum spe* vitae ac sanctitatis aeternae vivat. Et quamquam victoria a Christo reportata

³⁰ *Gen.* 3, 19.

de peccato morteque per propriam crucem et resurrectionem minime aufert temporales vitæ dolores neque a doloribus eximit integram historicam rationem vitæ humanæ, tamen in hanc rationem totam inque omnem dolorem ipsa *conicit lucem novam*, quæ est lux salutis. Hoc est Evangelii lumen, id est Boni Nuntii. In media hac ipsa luce reperitur veritas in colloquio cum Nicodemo patefacta: “Sic enim dilexit Deus mundum, ut Filium suum unigenitum daret”.³¹ Hæc veritas ex ipsis ejus fundamentis immutat historiam hominis illiusque terrestris condicionis: tametsi peccatum exstabat, quod in hac historia defixum erat tum uti originalis hereditas tum uti “peccatum mundi” tum uti singulorum peccatorum summa, Deus Pater Filium unigenitum dilexit, id est diligit eum constanter; in tempore dein, omnino ob hunc ipsum amorem, qui omnia vincit, ipse “dat” hunc Filium ut radices ipsas mali hominum attingat et sic modo salvifico accedat ad totum dolorum ambitum, cujus homo est particeps.

16. Christus opera messianica sua inter Israël populum sine intermissione accessit ad *ambitum humani doloris*. “Pertransivit benefaciendo”;³² et hæc ejus actio ante omnia pertinuit ad ipsos patientes atque adiumenta præstolantes. Sanavit ægrotos, afflictos est solatus, famelicos aluit, homines surditate et cæcitate, lepra, dæmonio

³¹ *Io.* 3, 16.

³² *Act.* 10, 38.

variisque corporis impedimentis liberavit, mortuis ter reddidit vitam. Persentiebat omnem hominum dolorem, tam corporis quam animi. Eodem autem tempore docebat, atque in ipso quasi centro ejus doctrinæ consistunt *octo beatitudines*, quæ ad homines diversis conflictatos asperitatibus in vita temporali diriguntur. Qui quidem sunt “pauperes spiritu” et “qui lugent” et “qui esuriunt et sitiunt justitiam” et “qui persecutionem patiuntur propter justitiam”, cum homines maledicunt iis eosque persequuntur et dicunt omne malum adversus eos, mentientes, propter Christum...³³ Ita secundum Matthæum; Lucas vero nominatim memorat eos “qui nunc esuriunt”.³⁴

Utrumque id est, appropinquavit Christus imprimis huic veluti regioni doloris humani eo quod ipsemet *in se hunc recepit dolorem*. Per suæ operæ publicæ tempus non solum fatigationem ac nullum tectum necnon ignorationem sui etiam apud maxime necessarios suos experiebatur, sed ante omnia arctius in dies circumfundebatur ambitu invidiæ ac apertiora in dies fiebant consilia amovendi eum ex vivis. Harum rerum sibi conscius est Christus ac sæpius cum discipulis suis loquitur de cruciatibus et morte, quæ ipsi manent: “Ecce ascendimus in Hierosolyman; et Filius hominis tradetur

³³ Cfr. *Matth.* 5, 3-11.

³⁴ Cfr. *Luc.* 6, 21.

principibus sacerdotum et scribis, et damnabunt eum morte et tradent eum gentibus et illudent ei et conspuent eum et flagellabunt eum et interficient eum, et post tres dies resurget”.³⁵ Christus suæ passioni mortique obviam procedit omni cum conscientia missionis suæ, qua hoc ipso modo perfungatur necesse est. Profecto efficere debet *per hanc ipsam suam passionem* ut homo “non pereat, sed habeat vitam æternam”. Per ipsam Crucem descendere debet ad mali radices, insertas in hominis historiam in animosque hominum. Per ipsam Crucem suam perficiat ille oportet *opus salutis*. Quod opus ex consilio æterni Amoris indolem habet redemptionis.

Hac de causa Christus acriter Petrum vituperat, cum inducere eum studet ut cogitationes de dolore morteque in Cruce deponat.³⁶ Et cum in horto Gethsemani comprehenditur, ipse Petrus eum defendere nititur gladio, cui Christus respondet: “Converte gladium tuum in locum suum... Quomodo ergo implebuntur Scripturæ quia sic oportet fieri?”.³⁷ Dicit præterea: “*Calicem, quem dedit mihi Pater, non bibam illum?*”.³⁸ Hæc responsio – haud secus atque aliæ, quæ variis Evangelii locis exstant

³⁵ *Mar.* 10, 33-34.

³⁶ Cfr. *Matth.* 16, 23.

³⁷ *Ibid.* 26, 52. 54.

³⁸ *Io.* 18, 11.

– ostendit quam penitus ipse Christus pervasus sit ea cogitatione, quam cum Nicodemo colloquens recluserat: “Sic enim dilexit Deus mundum, ut Filium suum unigenitum daret, ut omnis, qui credit in eum, non pereat, sed habeat vitam æternam”.³⁹ Christus itineri sese committit ad propriam passionem subeundam, conscius sibi virtutis ejus salvificæ; procedit Patri obtemperans, at potissimum *cum Patre in hoc sociatur amore*, quo mundum ipse hominemque in mundo dilexit. Quam ob rem Paulus de Christo scripsit: “Dilexit me et tradidit seipsum pro me”.⁴⁰

17. Implendæ fuerunt Scripturæ. Multi enim loci messianici Veteris Testamenti dolores prænuntiabant futuri Uncti-Christi Dei. Eorum omnium maxime animos movet *Carmen Servi Iahve Quartum* appellatum, quod in Libro Isaïæ continetur. Propheta, qui merito “quintus evangelista” nuncupatur, hoc in Carmine imaginem præbet dolorum Servi talibus adeoque vivis coloribus ut eos propriis oculis conspexisse videatur: corporis nempe oculis et mentis. Christi passio ita sub lumine versuum Isaïæ etiam significantior evadit magisque animos permovet quam in ipsorum evangelistarum narrationibus. En ante oculos nobis obversatur verus Homo dolorum:

³⁹ *Ibid.* 3, 16.

⁴⁰ *Gal.* 2, 20.

“Non erat species ei neque decor, ut aspiceremus eum, ... / Despectus erat et novissimus virorum, / *vir dolorum* et sciens infirmitatem, / et quasi abscondebamus vultum coram eo; / despectus, unde nec reputabamus eum. / Vere languores nostros ipse tulit / et *dolores nostros ipse portavit*; / et nos putavimus eum quasi plagatum, / percussum a Deo et humiliatum. / Ipse autem vulneratus est propter iniquitates nostras, / attritus est propter scelera nostra; / disciplina pacis nostræ super eum, / et livore ejus sanati sumus. / Omnes nos quasi oves erravimus, / unusquisque in viam suam declinavit; / et *posuit Dominus in eo iniquitatem omnium nostrum*”.⁴¹

Carmen Servi perdolentis descriptionem præ se fert, in qua denotari aliquo modo possunt momenta Christi passionis in minutioribus ejus rebus: comprehensio, contumelia, alapæ, sputa, contemptio ipsius dignitatis captivi, iniquum judicium ac deinde flagellatio, corona spinarum capiti imposita et opprobrium, via crucis, crucifixio, agonia.

Magis autem quam hæc passionis descriptio tangit animos nostros in prophetæ verbis *profunditas Christi sacrificii*. Ecce enim, quantumvis innocens, recipit in se omnium hominum dolores, quoniam peccata omnia sibi assumit. “Posuit Dominus in eo iniquitatem omnium nostrum”:

⁴¹ Is. 53, 2-6.

omne hominis peccatum secundum amplitudinem suam et altitudinem evadit vera causa doloris ipsius Redemptoris. Si tamen dolor “æstimatur” ex malo tolerato, voces prophetæ efficiunt ut mente comprehendamus *magnitudinem huius mali* et huius doloris, quem Christus suscepit. Dici potest hic dolor esse quædam “substitutio”; ante omnia vero est “redimens”. Homo dolorum illo in vaticinio revera est “agnus Dei, qui tollit peccatum mundi”.⁴² Ipsius enim dolore peccata auferuntur, quia is uti Filius unigenitus solus potuit in se illa recipere et assumere *cum illo erga Patrem amore, qui vincit* malum cuiusque peccati; quodammodo ad nihilum redigit hoc malum in illo veluti spatio spiritali necessitudinum inter Deum genusque hominum ac spatium bono replet.

Attingimus hic duplicem naturam unius subjecti personalis doloris redimentis. Ipse, qui passione sua morteque in Cruce efficit Redemptionem, Filius est unigenitus, quem Deus “dedit”. Simul autem hic *Filius consubstantialis Patri patitur ut homo*. Habet enim dolor ejus rationes humanas, habet etiam – semel in generis hominum historia – altitudinem ac vim, quæ, licet humanæ sint, incomparabilis cujusdam esse possunt profunditatis et acerbitalis dolorum, quatenus Homo patiens ut persona est ipse Filius unigenitus: “Deus de Deo”. Quapropter solus ille

⁴² *Io.* 1, 29.

– Filius unigenitus – amplecti valet magnitudinem mali, quæ in hominis reperitur peccato: in unoquoque peccato atque in peccato “universali” secundum rationes vitæ historicæ generis hominum in terris.

18. Dici possunt supra explicatæ cogitationes perducere nos iam recta via in hortum Gethsemani ipsumque Calvariæ locum, ubi Carmen perdolentis Servi in Libro Isaiaë exstans est completum. Prius vero quam illuc progrediamur, sequentes legamus Carminis versus, qui prophetico modo prænuntiant passionem in loco Gethsemani et Calvariæ. Servus ille patiens – et hoc vicissim pernecessarium est ad recte explanandam Christi passionem – *sibi induit* eos dolores, de quibus iam est dictum, *omnino voluntarie*:

“Afflictus est et ipse subjecit se / et non aperuit os suum; / sicut agnus, qui ad occisionem ducitur, / et quasi ovis, quæ coram tondentibus se obmutuit / et non aperuit os suum. / Angustia et iudicio sublatus est. / De generatione ejus quis curabit? / Quia abscissus est de terra viventium; / propter scelus populi mei percussus est ad mortem. / Et posuerunt sepulcrum ejus cum impiis, / cum divitibus tumulum ejus, / eo quod iniquitatem non fecerit, / neque dolus fuerit in ore ejus”.⁴³

⁴³ Is. 53, 7-9.

Christus voluntarie patitur innocensque patitur. Dolore enim suo interrogationem illam recipit, quæ – ab hominibus sæpius posita – in Libro Iob quodammodo extrema quadam ratione est enuntiata. Attamen Christus non tantum secum defert eandem interrogationem (id quod facit ratione etiam multo pleniore, quandoquidem ipse non solum homo est uti Iob sed unigenitus Dei Filius), verum etiam refert *maximum modum ipsius responsionis, quæ reddi potest eidem huic interrogationi.* Dicas responsionem quodammodo eadem ex materia emergere, qua facta sit interrogatio. Reddit enim Christus responsionem quæstioni de dolore dolorisque significatione non solum per doctrinam suam, Bonum scilicet Nuntium, sed imprimis per proprium dolorem, qui via organica et indissolubili in doctrinam Boni Nuntii inseritur. Atque hoc est *postremum* compendiarium verbum huius *doctrinæ*: “verbum... crucis”, sicut postmodum Sanctus Paulus dixit.⁴⁴

Illud “verbum crucis” perpetua veritate imaginem antiqui vaticinii perficit. Multi loci multique sermones per totum publice docendi ejus tempus testantur quo pacto Christus ab initio complectatur hanc passionem, quæ voluntas Patris est in mundi salutem. Ultimus tamen gressus hic evadit *precatio in horto Gethsemani.* Voces enim: “Pater mi, si possibile est, transeat a me calix iste; verumtamen non sicut ego volo, sed

⁴⁴ Cfr. 1 Cor. 1, 18.

sicut tu”,⁴⁵ ac deinde: “Pater mi, si non potest hoc transire, nisi bibam illud, fiat voluntas tua”,⁴⁶ multiplicem exhibent eloquentiam. Namque veritatem illius amoris comprobant, quo Patrem unigenitus Filius prosequitur pro sua obœditione. Simul vero veritatem testificantur ejus doloris. Verba quidem orationis Christi in horto Gethsemani *veritatem amoris per doloris veritatem* demonstrant. Christi voces plana simplicitate confirmant hanc veritatem humanam doloris usque ad extremum: dolor significat malum subire, coram quo homo cohorrescit. Dicit enim: “transeat a me”, perinde ac dicit Christus in horto Gethsemani.

Verba ipsius testantur simul unicam hanc et incomparabilem altitudinem vimque doloris, quam solus experiri potuit Homo, qui est Filius unigenitus; testificantur *profunditatem et vehementiam illam*, quam supra prolatae prophetæ voces adjuvant suo modo ut intellegamus. Non certe usque ad extremum (nam ut hoc fieret, necesse esset pervadere ad medium ipsum mysterium divinum et humanum Subjecti), sed saltem ut percipiamus illam distinctionem (ac similitudinem eodem tempore), quæ intercedere potest inter omnem opinabilem hominis dolorem ac Dei-Hominis passionem. Gethsemani locus est, ubi hic ipse dolor, secundum totam veritatem a

⁴⁵ *Matth.* 26, 39.

⁴⁶ *Ibid.* 26, 42.

propheta declaratam de malo, quod in eo est expertus, *pæne terminali modo ante oculos mentis Christi est patefacta.*

Voces in horto Gethsemani pronuntiatas sequuntur verba in Calvariæ loco dicta, quæ hanc altitudinem testantur – unicam in mundi historia – mali ipsius doloris, qui toleratur. Cum Christus clamat: “Deus meus, Deus meus, ut quid dereliquisti me?”, verba ejus non tantum exprimunt illum animum derelictum, qui sæpius in Vetere Testamento occurrit, præsertim in Psalmis ac nominatim in Psalmo 22 [21], unde verba memorata oriuntur.⁴⁷ Dici possunt hæ derelictionis enuntiationes nasci ex statu inseparabilis conjunctionis Filii cum Patre atque idcirco nasci quod Pater “posuit... in eo iniquitatem omnium nostrum”⁴⁸ ad formam eorum quæ deinceps Sanctus Paulus dixit: “Eum, qui non noverat peccatum, pro nobis peccatum fecit, ut nos efficeremur justitia Dei in ipso”.⁴⁹ Una autem cum hoc terrifico pondere, Christus – *æstimando “integro” malo*, quod in peccato continetur, quo *Deus reicitur* – per ipsam divinam profunditatem Filii conjunctionis cum Patre experitur aliquo modo humanitus ineffabili *hunc dolorem, qui est sejunctio*, repudiatio Patris, abrupta necessitudo cum Deo. At per ipsum hunc

⁴⁷ Ps. 22 [21], 2.

⁴⁸ Is. 53, 6.

⁴⁹ 2 Cor. 5, 21.

dolorem Redemptionem ille operatur valetque moriens dicere: “Consummatum est”.⁵⁰

Dici potest scriptura esse impleta ac verba commemorati Carminis Servi perdolentis dici possunt in perpetuum revera deducta esse ad effectum: “Dominus voluit conterere eum infirmitate”.⁵¹ Ad summum evasit hominum dolor in ipsa Christi passione. Hæc vero simul ingressa est novam prorsus condicionem novumque rerum ordinem: *alligata est ad amorem*, illum profecto amorem, de quo Christus cum Nicodemo est locutus, ad amorem, qui bonum gignit, generans hoc etiam ex malo, generans per dolorem, quemadmodum supremum bonum mundi redemptionis eductum est de Christi Cruce continenterque ex ea profluit. Crux Christi fons effecta est, unde fluunt aquæ vivæ.⁵² In ipsa etiam oportet quæstionem repetamus de doloris significatione ibique responsionem eidem huic interrogationi usque ad finem legamus.

V

19. Idem Carmen de Servo perdolente, quod Libro Isaïæ continetur, prorsus ad huiusmodi interrogationem ac responsionem hisce nos ducit versibus, qui sequuntur:

⁵⁰ *Io.* 19, 30.

⁵¹ *Is.* 53, 10.

⁵² *Cfr. Io.* 7, 37-38.

“Si posuerit in piaculum animam suam, / videbit semen longævum, / et voluntas Domini in manu ejus prosperabitur. / *Propter laborem* animæ ejus / *videbit lucem*, saturabitur in scientia sua. / *justificabit* justus servus meus *multos* / et iniquitates eorum ipse portabit. / Ideo dispertiam ei multos, / et cum fortibus dividet spolia, / pro eo quod tradidit in mortem animam suam / et cum sceleratis reputatus est; / et ipse peccatum multorum tulit / et pro transgressoribus rogat”.⁵³

Licet quidem affirmari omnem dolorem humanum una cum Christi passione in nova condicione versari. Quod ita se habet quasi Iob id præsenſerit, cum hæc locutus est verba: “Scio enim quod redemptor meus vivit...”,⁵⁴ et quasi ad ejusmodi condicionem suum dolorem direxerit, qui sine Redemptione non secundum integram suam vim ei innotescere potuit. In Cruce Christi non solum Redemptio per passionem perfecta est, sed ipse etiam dolor humanus *est redemptus*. Christus – nulla sua culpa – “totum peccati malum” in se recepit. Cujus ipsius mali experimento Christi dolorum incomparabilis amplitudo definita est, qui *pretium Redemptionis* facti sunt. De hac re loquitur Isaias in Carmine de Servo perdolente suoque tempore de ea egerunt testes Novi Foederis, cujus pactio Sanguine Christi est facta. En ex prima Epistula Petri

⁵³ Is. 53, 10-12.

⁵⁴ Iob. 19, 25.

Apostoli verba: “Scientes quod non corruptibilibus argento vel auro redempti estis de vana vestra conversatione a patribus tradita, sed *pretioso sanguine* quasi Agni incontaminati et immaculati Christi”.⁵⁵ In Epistula autem ad Galatas dicit Paulus Apostolus: “Dedit semetipsum pro peccatis nostris, ut eriperet nos de præsentis sæculo nequam”,⁵⁶ atque in Epistula ad Corinthios: “Empti enim estis pretio: glorificate ergo Deum in corpore vestro!”.⁵⁷

Hisce aliisque ejusmodi verbis testes Novi Foederis de redemptionis magnitudine loquuntur, quæ perfecta est Christi passione. Loco hominis et pro homine passus est Redemptor. Omnis homo *suam partem in Redemptione habet*. Quisque etiam vocatur ad *passionem illam participandam*, qua perfecta est Redemptio, ad participandam passionem vocatur, per quam etiam redemptus est omnis dolor humanus. Christus, passione sua Redemptionem efficiens, simul *ad gradum Redemptionis extulit dolorem humanum*. Omnis igitur etiam homo, suo affectus dolore, fieri potest Christi passionis redemptricis particeps.

20. Novi Testamenti multi loci huiusmodi sententiam enuntiant. In secunda Epistula ad Corinthios hæc scribit Apostolus: “In omnibus tribulationem patimur sed non angustiamur,

⁵⁵ 1 Petr. 1, 18-19.

⁵⁶ Gal. 1, 4.

⁵⁷ 1 Cor. 6, 20.

aporiatur sed non destituimur, persecutionem patimur, sed non derelinquimur, deicimur sed non perimus, semper *mortificationem Iesu in corpore circumferentes*, ut et vita Iesu in corpore nostro manifestetur. Semper enim nos qui vivimus in mortem tradimur propter Iesum, ut et vita Iesu manifestetur in carne nostra mortali..., scientes quoniam qui suscitavit Dominum Iesum et nos cum Iesu suscitabit”.⁵⁸

De variis doloribus loquitur Sanctus Paulus, imprimisque de illis, quorum participes fiebant “propter Iesum” primi Christiani. Hi dolores efficiunt ut ii quibus memorata Epistula est data, Redemptionis opus participant, quod peractum est passione ac morte Redemptoris. Attamen *Crucis mortisque significans vis ac momentum significante vi ac momento resurrectionis* complentur. In resurrectione lucem homo omnino novam invenit, qua in itinere percurrendo per tot contumeliarum et dubiorum atque desperationis necnon persecutionis tenebras sane adjuvatur. Quare et in secunda ad Corinthios Epistula scripsit Apostolus: “Quoniam sicut *abundant passiones Christi in nobis*, ita per Christum abundat et consolatio nostra”.⁵⁹ Alibi animum addit iis quos per epistulam affatur, cum ita scribit: “Dominus autem dirigat corda vestra in caritatem

⁵⁸ 2 Cor. 4, 8-11. 14.

⁵⁹ *Ibid.* 1, 5.

Dei et patientiam Christi”.⁶⁰ In Epistula vero ad Romanos sic eos alloquitur: “Obsecro itaque vos, fratres, per misericordiam Dei, ut *exhibeatis corpora vestra hostiam viventem, sanctam, Deo placentem, rationabile obsequium vestrum*”.⁶¹

Christi passionis communicatio in apostolicis his elocutionibus quasi duplicem induit rationem. Si Christi dolorum particeps fit homo, id propterea accidit quod Christus *suam passionem homini aperuit*, quod in salvifico dolore suo omnium humanorum dolorum particeps ipse aliquo modo est factus. Dum per fidem homo redemptricem Christi passionem invenit, suos simul dolores in ea reperit, *eisdemque* nova continentia novaque significatione locupletatos *pervidet per fidem*.

Hæc cognitio Paulo gravissima suasit verba in Epistula ad Galatas: “Christo confixus sum cruci: vivo autem iam non ego, vivit vero in me Christus; quod autem nunc vivo in carne, in fide vivo Filii Dei, qui dilexit me et tradidit se ipsum pro me”.⁶² Fides efficit ut horum verborum auctor amorem agnoscat, quo ad Crucem ductus est Christus. Quodsi, patiendo ac moriendo, ita ipse dilexit, hac proinde sua passione ac morte etiam *vivit in eo quem ita dilexit*, id est in homine vivit: in Paulo. In eo autem vivens – dum Paulus,

⁶⁰ 2 *Thess.* 3, 5.

⁶¹ *Rom.* 12, 1.

⁶² *Gal.* 2, 19-20.

fide talis rei sibi conscius, amorem ejus pensat amore suo – Christus specialem etiam in modum *per Crucem cum homine*, cum Paulo, *conjungitur*. Quæ conjunctio etiam alia haud minus gravia verba Paulo suasit in eadem ad Galatas Epistula: “Mihi autem absit gloriari nisi in cruce Domini Nostri Iesu Christi, per quem mihi mundus crucifixus est, et ego mundo”.⁶³

21. Crux Christi salvificam lucem in vitam hominis in ejusque dolorem præcipue conicit tam vehementer, quia illum hominem per fidem *una cum resurrectione* attingit: mysterium passionis mysterio paschali continetur. Qui Christi passionis, iidem et resurrectionis ejus sunt testes. Hæc enim scribit Sanctus Paulus: “Ad cognoscendum illum (Christum) et virtutem resurrectionis ejus et communionem passionum illius, conformans me morti ejus, si quo modo occurram ad resurrectionem, quæ est ex mortuis”.⁶⁴ Revera “virtutem resurrectionis” Christi primum expertus est Apostolus in itinere ad Damascum, et nonnisi postea in huiusmodi veluti luce paschali ad illam “communionem passionum ejus” pervenit, de qua is loquitur, ex gr. in Epistula ad Galatas. Aperte paschalis est via Pauli: *communio Crucis Christi fit per Resuscitati experientiam*, id est per peculiarem resurrectionis participationem. Hac de causa etiam in Apostoli

⁶³ *Ibid.* 6, 14.

⁶⁴ *Phil.* 3, 10-11.

locutionibus de tribulatione ratio tam sæpe occurrit gloriæ, cujus initium facit Crux Christi.

Crucis et resurrectionis testes persuasum id sibi habebant: “Per multas tribulationes oportet nos intrare in regnum Dei”.⁶⁵ Paulus præterea, Thessalonicensibus scribens, hæc dicit: “Ita ut et nos ipsi in vobis gloriemur... pro patientia vestra et fide in omnibus persecutionibus vestris et tribulationibus, quas sustinetis, indicium justiciæ Dei, ut *digni habeamini Regno Dei*, pro quo et patimini”.⁶⁶ Ita igitur Christi passionum communio simul est passio pro Regno Dei. Coram justo Deo ejusque judicio eodem Regno digni Sunt quotquot Christi passiones participant. Per tribulationes suas infinitum pretium passionis ac mortis Christi, quod factum est nostræ Redemptionis pretium, aliquatenus ipsi restituunt: hoc pretio Regnum Dei denuo solidatum est in historia hominis, vitæ ejus terrenæ terminalis veluti prospectus evadens. Per tribulationes nos Christus in hoc Regnum immisit; atque etiam homines ad id ædificandum *maturescunt*, qui Christi redemptionis mysterio veluti obvolvuntur.

22. Cum eo prospectu Regni Dei conjungitur etiam illius gloriæ spes, quæ a Christi Cruce capit initium. Resurrectione hæc gloria ostenditur – gloria eschatologica –, quæ præ immensis tormentis omnino in Cruce Christi obscurabatur.

⁶⁵ Act. 14, 22.

⁶⁶ 2 Thess. 1, 4-5.

Qui Christi passionum sunt participes, suis tribulationibus ipsi etiam ad *gloriam* participandam vocantur. Variis locis res a Paulo declaratur. Ad Romanos hæc ipse scribit: “Coheredes autem Christi, si tamen compatimur ut et conglorificemur. Existimo enim quod non sunt condignæ passiones huius temporis ad futuram gloriam quæ revelanda est in nobis”.⁶⁷ In secunda Epistula ad Corinthios hæc legimus: “Id enim, quod in præsentis est, leve tribulationis nostræ supra modum in sublimitatem æternam gloriæ pondus operatur nobis, non contemplantibus nobis quæ videntur, sed quæ non videntur”.⁶⁸ Petrus Apostolus in prima Epistula sua hanc enuntiavit veritatem: “Quemadmodum communicatis Christi passionibus, gaudete, ut et in revelatione gloriæ ejus gaudeatis exultantes”.⁶⁹

Causa *passionis et gloriæ* induit proprietatem prorsus evangelicam, quæ quidem, quatenus ad Crucem refertur ac resurrectionem, clare illustratur et patescit. Resurrectio conversa est ante omnia in gloriæ manifestationem, quæ per Crucem peractæ Christi exaltationi plane respondet. Etenim, etsi hominibus Crux visa est veluti Christi *spoliatio*, simul vero coram Deo fuit *ejus exaltatio*. Mandatum suum Christus in Cruce prorsus est assecutus et effecit: is, voluntatem

⁶⁷ Rom. 8, 17-18.

⁶⁸ 2 Cor. 4, 17-18.

⁶⁹ 1 Petr. 4, 13.

Patris implendo, etiam semetipsum simul confirmavit perfecitque. In infirmitate *potentiam* suam et in humilitate plenam *magnitudinem messianicam* ostendit. Nonne huiusmodi magnitudinem omnia testantur verba, quæ ipse in Golgotha, cum animam ageret, locutus est, et imprimis de crucifixionis auctoribus: “Pater, dimitte illis, non enim sciunt quid faciunt”?⁷⁰ Verba hæc, sua veluti supremi exempli vi, eos movent, qui sunt Christi passionum participes. Dolor præterea quædam est hortatio ad magnitudinem moralem hominis ejusque *spiritalem maturitatem* patefaciendam. Variis sane ætatibus id comprobaverunt Christi martyres et confessores, hisce fisci verbis: “Et nolite timere eos, qui occidunt corpus, animam autem non possunt occidere”.⁷¹

Christi resurrectio “gloriam futuri sæculi” revelavit ac simul “gloriam Crucis” confirmavit: eam nempe *gloriam, quæ in ipsa Christi passione continetur*, et quæ in dolore hominis sæpe imaginis instar reddita est et redditur, tamquam spiritualis ejus excelsitatis ostensio. Quæ gloria non solum in fidei martyribus oportet agnoscat, sed in compluribus etiam aliis hominibus, qui interdum, etsi non in Christum credunt, propter veritatem aliamve justam causam mala patiuntur et vitam profundunt. In horum omnium tribulationibus

⁷⁰ *Luc.* 23, 34.

⁷¹ *Matth.* 10, 28.

specialem in modum magna hominis dignitas confirmatur.

23. Semper enim dolor est *experimentum* – idemque nonnumquam satis arduum – quod hominum generi imponitur. Ex Sancti Pauli Epistularum paginis illud Evangelii *mirum communique opinioni contrarium*, quod *in infirmitate ac virtute* consistit, sæpe nos quasi alloquitur, quodque præsertim expertus est ipse Apostolus atque cum eo omnes, qui sunt Christi passionum participes, experiuntur. In secunda Epistula ad Corinthios scribit Paulus: “Libentissime igitur potius gloriabor in infirmitatibus meis, ut inhabitet in me virtus Christi”.⁷² Hæc in secunda ad Timotheum Epistula legimus: “Ob quam causam etiam hæc patior, sed non confundor; scio enim cui credidi”.⁷³ Hoc profecto ipse dicit in Epistula ad Philippenses: “Omnia possum in eo, qui me confortat”.⁷⁴

Qui Christi passiones participant, ii paschale ante oculos habent Crucis et resurrectionis mysterium, in quo Christus ad extremos usque fines humanæ infirmitatis et inopiæ primo quidem descendit: ipse enim moritur Cruci affixus. At in tali *infirmitate* si ejus etiam *exaltatio* simul efficitur, quæ confirmata est resurrectionis virtute, id ipsum ostendit infirmitates omnium humanarum

⁷² 2 Cor. 12, 9.

⁷³ 2 Tim. 1, 12.

⁷⁴ Phil. 4, 13.

tribulationum ea ipsa Dei virtute, quæ revelata est in Cruce Christi, permeari posse. In hac cogitandi ratione *pati* idem est ac singulari modo fieri *sentientem* et *operi salvificæ Dei virtutis*, quæ homini in Christo præbetur, *patientem*. Deus in eo confirmavit se per specialem passionem potissimum agere velle, per hominis videlicet infirmitatem et spoliationem, in iisque ipsis se suam velle virtutem revelare. Hoc pacto etiam hortamentum in prima Petri Epistula potest explanari: “Si autem ut christianus (patitur), non erubescat, glorificet autem Deum in isto nomine”.⁷⁵

In Epistula ad Romanos Paulus Apostolus vel copiosiora de hoc “virtutis ortu in infirmitate” enuntiat necnon de hac *spiritali* hominis *renovatione* in temptationibus ac tribulationibus, quæ quidem eorum qui sunt Christi passionum participes, specialis est vocatio: “Sed et gloriamur in tribulationibus, scientes quod tribulatio patientiam operatur, patientia autem probationem, probatio vero spem; spes autem non confundit, quia caritas Dei diffusa est in cordibus nostris per Spiritum Sanctum, qui datus est nobis”.⁷⁶ Inest autem in dolore peculiaris quædam hominis *vocatio ad virtutem*, quam pro sua parte ipse colere debet. Et hæc est perseverantiæ virtus in molestiis malisque ferendis. Ita agens

⁷⁵ 1 Petr. 4, 16.

⁷⁶ Rom. 5, 3-5.

homo eam spem elicit, qua persuasum sibi habet neque se oppressum iri tribulatione, neque se hominis dignitate, quæ conjungitur cum conscientia sensus vitæ, spoliari umquam posse. En autem ejusmodi sensus simul cum *opere caritatis Dei*, quod maximum Spiritus Sancti est donum, manifestatur. Homo, quatenus hanc caritatem participat, in tribulatione se penitus reperit: “animam” invenit, quam se ob dolores perdidisse⁷⁷ putabat.

24. Apostoli tamen, qui Christi dolorum est particeps, experientiæ etiam ulterius progrediuntur. In Epistula ad Colossenses hæc legimus, quæ spiritalis itineris veluti metam postremam, ad tribulationes quod attinet, efficiunt. Hæc Sanctus Paulus scribit: “Nunc gaudeo in passionibus pro vobis, et *adimpleo ea, quæ desunt passionum Christi, in carne mea pro corpore ejus, quod est Ecclesia*”.⁷⁸ In alia Epistula eos, quibus mittitur, sic ipse interrogat: “Nescitis quoniam corpora vestra membra Christi sunt?”⁷⁹

In mysterio paschali Christus initium fecit *conjunctionis cum homine in Ecclesie communitate*. Mysterium Ecclesie sic declaratur: in ipsa Baptismi collatione, qua Christo configuratur homo, deinde per Christi Sacrificium – sacramentaliter per Eucharistiam – Ecclesia

⁷⁷ Cfr. *Mar.* 8, 35; *Luc.* 9, 24; *Io.* 12, 25.

⁷⁸ *Col.* 1, 24.

⁷⁹ *1 Cor.* 6, 15.

semper ut corpus Christi continuo spiritaliter ædificatur. In hoc corpore Christus vult cum cunctis hominibus conjungi imprimisque dolentes sibi conjungit. Allata Epistolæ ad Colossenses verba singularem huius conjunctionis proprietatem testantur. Etenim *qui una cum Christo condolescit* – quemadmodum Paulus Apostolus Christo adhærens suas fert “tribulationes” – non solum illam virtutem a Christo haurit, quæ antea est dicta, sed sua etiam passione ipse, “quæ desunt passionum Christi adimplet”. In hac evangelica expositione veritas *de creatrice doloris natura* singulariter in lumine ponitur. Christi passio bonum redemptionis mundi effecit, quod quidem in se ipso inexhaustum est et infinitum neque ei quidquam ab ullo homine addi potest. Simul vero in Ecclesiæ mysterio ut in corpore suo Christus aliqua ratione redemptricem passionem suam omnibus hominum tribulationibus aperuit. Prout homo fit Christi passionis particeps – ubicumque in orbe terrarum quolibetque historiæ tempore – ita ejusmodi passionem *suo modo ipse adimplet*, per quam Christus mundi redemptionem est operatus.

Numquid ex hoc inferitur imperfectam esse redemptionem, quam Christus ad effectum adduxerit? Non est ita. Id enim non aliud significat nisi redemptionem, quæ vi amoris satisfactorii est acta, *omni semper caritati patere*, quæ *in hominis dolore* ostenditur. In hoc ambitu – in

ambitu scilicet amoris – redemptio, quæ penitus iam perfecta est, aliqua ratione perficitur continenter. Christus redemptionem penitus quidem peregit ac quidem usque ad finem; simul tamen eam non conclusit: in redemptrice hac passione, per quam est redemptio omnium peracta, Christus inde ab initio complexus est semperque id omne complectitur, quod mortales patiuntur. Ita est: ad ipsam *redemptricis Christi passionis essentiam* pertinere videtur ratio, ob quam ejusmodi passio poscit ut continenter adimpleatur.

Ita, ea quoque amplexus, quæ mortales patiuntur, sua passione Christus mundum redemit. Hæc vero redemptio, etsi per Christi passionem omnino est completa, simul nihilominus suo modo in hominis historia viget et progreditur. Viget et progreditur ut Christi corpus, quod est Ecclesia, omnisque dolor humanus hac ratione ob omnium communionem in caritate Christi, Christi passionem adimplet, *quemadmodum Ecclesia salvificum complet opus Christi*. Mysterium Ecclesiæ – talis videlicet corporis, quod in se ipso etiam perficit Christi corpus cruci affixum et ab inferis excitatum – simul illud spatium exhibet, in quo dolores humani complent Christi dolores. In hoc ambitu conceptuque Ecclesiæ-Christi corporis, quod continenter et omni loco et tempore progreditur, cogitare licet et loqui de iis “quæ desunt” passionum Christi.

Clare ceteroqui id ab Apostolo illustratur, cum de iis adimplendis scribit, “quæ desunt passionum Christi... pro corpore ejus, quod est Ecclesia”.

Ipsa *Ecclesia*, quæ de infinitis redemptionis divitiis assidue haurit, hanc inferens in vitam generis humani, *est ratio*, qua Christi passio redemptrix dolore hominis perpetuo compleri potest. Hoc modo divina humanaque illustratur natura Ecclesiæ. Cujus naturæ proprietates dolor aliquo modo participare videtur, qui propterea peculiarem utilitatem præ se fert coram Ecclesia. Ipse dolor est bonum, quod Ecclesia, omnino firmiter credens redemptionem, observanter colit, pro tota scilicet altitudine illius fidei, qua redemptionem credit, qua immensum et inenarrabile Christi corporis mysterium complectitur.

VI

25. Christi Crucis ac resurrectionis testes Ecclesiæ et humano generi peculiare Evangelium doloris tradiderunt. Redemptor ipse primus hoc scripsit Evangelium sua passione amoris causa suscepta ut homo “non pereat, sed habeat vitam æternam”.⁸⁰ Hæc passio, una cum vivo verbo disciplinæ, copiosus factus est fons iis omnibus, qui participes erant dolorum Christi in prima generatione ejus discipulorum confessorumque ac deinde in generationibus, quæ sæculorum cursu

⁸⁰ *Io.* 3, 16.

sunt secutæ. Est imprimis solacii causa – res sane Evangelio et historia comprobata – quod juxta Christum, loco primario et probe significato, sancta ejus Mater semper adest ad dandum egregium testimonium, quod *tota vita sua* de hoc singulari Evangelio doloris perhibet. Permultæ et vehementes passionες confluerunt in talem nexum et colligationem, ut non solum fidem ejus inconcussam comprobarent, verum etiam ad redemptionem omnium conferrent. Re quidem vera, inde ab arcano colloquio cum angelo habito, ea in materna sua missione prospicit “munus, cui destinatur”, ipsam Filii missionem modo unico et non iterabili participandi. Quod brevissimo tempore sive iis confirmatur, quæ in Iesu nativitate in oppido Bethleem evenerunt, sive certa definitaque prænuntiatione, a Simeone sene facta, qui de tam acuto gladio est locutus, qui animam ejus esset pertransiturus, sive angoribus et angustiis in fuga Ægyptiorum versus, ob crudelem Herodis deliberationem præpropere arrepta, tolerandis.

Præterea, post ea quæ a Filio in vita abdita et publica sunt gesta – quorum illa pro animo suo quam maxime tenero sine ulla dubitatione particeps fuit – dolores Beatæ Mariæ Virginis in Calvariæ loco ad fastigium pervenerunt, cujus altitudo mente humana vix fingi quidem potest, sed certe arcana fuit et supernaturali ratione fecunda pro universali redemptione. Ascensus ille

in Calvariæ locum, illud “stare” juxta Crucem una cum discipulo præ ceteris dilecto, communicatio prorsus peculiaris fuerunt mortis redemptricis Filii, atque etiam verbis, quæ ex ejus ore audivit, ei quasi sollemniter est mandatum ut hoc Evangelium omnino singulare universæ communitati credentium nuntiaret.

Beatissima Virgo Maria, quippe quæ *præsens adesset*, particeps effecta passionis *compatiendo*, singularem in modum ad Evangelium doloris contulit, cujus non paucas quasi paginas una cum Filio conscripsit, et in antecessum verba Sancti Pauli vivendo implevit, in initio huius Epistolæ allata. Illa enim prorsus particularem causam habet ut dicat se “adimplere in carne sua – quemadmodum iam in corde fecit – ea quæ desunt passionum Christi”.

Luce affulgente incomparabilis exempli Christi, quæ in vita ejus Matris repercussa singulariter refulget, Evangelium doloris, testimonio et scriptis Apostolorum, fit *fons inexhaustus generationibus semper novis*, quæ sibi succedunt in historia Ecclesiæ. Evangelium doloris non solum ostendit adesse in Evangelio dolorem tamquam unum ex argumentis Boni Nuntii, sed etiam recludit *salvificam virtutem atque significationem salvificam doloris* in missione messianica Christi ac postea in missione et vocatione Ecclesiæ.

Christus *hand celabat* auditores suos hoc: *neesse esse pati*. Apertis enim verbis dixit: “Si quis vult post me venire, ... tollat crucem suam cotidie”,⁸¹ et discipulis suis moralia dabat præcepta, quorum exsecutio tantummodo fieri potest “semetipsum abnegando”.⁸² Via, quæ ducit ad Regnum cælorum, est “angusta et arcta”, eamque Christus contraponit “latæ et spatiosæ” viæ, quæ tamen “ducit ad perditionem”.⁸³ Sæpe Christus etiam affirmabat discipulos suos et confessores *multas persecutiones esse passuros*, quod – ut constat – evenit non solum prioribus sæculis vitæ Ecclesiæ in Romano imperio, sed etiam factum est et fit variis historiæ ætatibus variisque terræ locis, hac nostra quoque ætate.

En nonnulla Christi verba, quæ ad hoc argumentum pertinent: “Iniciant vobis manus suas et persequentur tradentes in synagogas et custodias, et trahemini ad reges et præsides propter nomen meum; *continget* autem vobis *in testimonium*. Ponite ergo in cordibus vestris non præmeditari quemadmodum respondeatis; ego enim dabo vobis os et sapientiam, cui non poterunt resistere vel contradicere omnes adversarii vestri. Trademini autem et a parentibus et fratribus et cognatis et amicis, et morte afficient ex vobis, et eritis odio omnibus *propter*

⁸¹ *Luc.* 9, 23.

⁸² Cfr. *ibid.*

⁸³ Cfr. *Matth.* 7, 13-14.

nomen meum. Et capillus de capite vestro non peribit. In patientia vestra possidebitis animas vestras”.⁸⁴

Evangelium doloris prius tractat variis locis de dolore “pro Christo” et “propter Christum” ipsis verbis Iesu vel verbis ejus Apostolorum. Magister non celat discipulos suos et assecclas eventum, ex quo forte essent sic passuri, quin immo id aperte manifestat ostendens simul divinas opes, quæ eos sustinebunt inter persecutiones ac tribulationes “propter nomen Christi”. Hi dolores etiam *singulari quidem modo comprobabunt* similitudinem cum Christo et unitatem cum eo. “Si mundus vos odit, scitote quia me priorem vobis odio habuit...; quia vero de mundo non estis, sed ego elegi vos de mundo, propterea odit vos mundus...: Non est servus maior domino suo. Si me persecuti sunt, et vos persequentur... Sed hæc omnia facient vobis propter nomen meum, quia nesciunt eum, qui misit me”.⁸⁵ “Hæc locutus sum vobis, ut in me pacem habeatis; in mundo pressuram habetis, sed confidite, ego vici mundum”.⁸⁶

Hoc primum caput Evangelii doloris, in quo agitur de persecutionibus, id est de tribulationibus propter Christum, *peculiarem* continet *cohortationem ad bonum animum animique fortitudinem*, quæ insigni

⁸⁴ *Luc.* 21, 12-19.

⁸⁵ *Io.* 15, 18-21.

⁸⁶ *Ibid.* 16, 33.

virtute resurrectionis sustineatur. Christus vicit in omne tempus mundum resurrectione sua; tamen, ex eo quod hæc conectitur cum passione et morte, Christus simul vicit hunc mundum suis doloribus. Ita est. Dolor quidem singulari modo est insertus in illam victoriam de mundo, quæ patefacta est in resurrectione. Christus servat in suo corpore a mortuis suscitato signa vulnerum Crucis: in manibus suis et pedibus atque in latere. Resurrectione patefacit *vim victricem doloris* infunditque persuasionem de huiusmodi vi in animos tum eorum quos suos elegit Apostolos, tum eorum quos continenter eligit et mittit. Ait Paulus Apostolus: “Et omnes, qui volunt pie vivere in Christo Iesu, persecutionem patientur”.⁸⁷

26. Si primum magnum caput Evangelii doloris scribitur per generationes ab iis qui persecutiones patiuntur propter Christum, pariter per rerum cursum aliud magnum scribitur caput huiusce Evangelii. Scribunt illud ii omnes, qui *una cum Christo patiuntur*, humanos suos conjungentes dolores cum ejusdem passione salvifica. In iis adimpletur, quod primi testes passionis et resurrectionis dixerunt vel scripserunt de participatione Christi passionum. In iis igitur Evangelium doloris adimpletur simulque unusquisque eorum illud quodammodo scribere pergit: illud scribit et nuntiat mundo, illud nuntiat, ubi vivit, et hominibus nostræ ætatis.

⁸⁷ 2 *Tim.* 3, 12.

Constat per sæcula et generationes *in dolore singularem abscondi virtutem*, quæ intime *conjungat* hominem *cum Christo*, quod peculiaris est gratia. Cui gratiæ suam debent interiorem conversionem multi Sancti, veluti Sanctus Franciscus Assisiensis, Sanctus Ignatius de Loyola et alii. Huius conversionis effectus non solum in eo positus est ut homo inveniat significationem salvificam doloris, sed etiam ac quidem maxime ut in ipso dolore homo novus plane efficiatur. Is enim assequitur novam quasi rationem *totius suæ vitæ agenda et suæ implenda vocationis*. Quod homo sic detegit, id comprobatur præcipue magnitudinem spiritus, qui in eo superat corpus modo omnino incomparabili. Cum hoc corpus vehementer ægrotat, omnino est debilitatum, homo fere non valet vivere et agere, tum magis eminent *interior maturitas et spiritalis magnitudo*, quod animos permovens est disciplina hominibus bene sanis.

Hæc interior maturitas et spiritalis magnitudo in dolore revera *efficiuntur* peculiari *conversione* et sociata opera cum Gratia Redemptoris cruci affixi. Ipse radicitus operatur in humanis doloribus per Spiritum suum veritatis, per Spiritum Consolatorem. Ipse quodammodo commutat ipsam substantiam spiritalis vitæ, dum ostendit ægroto homini se ei adesse. *Ipsæ* – ut Magister et animi Dux – *edocet* dolentes fratres et sorores de hoc *admirabili commercio*, posito in ipso intimo mysterio Redemptionis. Dolor suapte

natura est experiri malum. At Christus in eo firmissimum posuit fundamentum perennis boni, videlicet boni salutis æternæ. Christus patiendo in Cruce ipsas radices attigit mali, quod est peccatum et mors. Ille vicit artificem mali, Satanam, ejusque constantem seditionem adversus Creatorem. Christus fratri vel sorori dolentibus *patefacit* et indicat gradatim *fines Regni Dei*, videlicet mundi ad Creatorem conversi et a peccato liberati, qui sensim fundatur super virtutem salvificam amoris. Et Christus, pedetemptim sed efficaciter, inserit in huiusmodi mundum, in hoc Regnum Patris, hominem dolori obnoxium quodammodo ipsis medullis doloris. Dolor enim non potest *converti* atque mutari extrinsecus per gratiam sed *intrinsecus*. Christus autem per salutiferam suam passionem quam maxime inest in omni hominum dolore et intra eum operari valet per virtutem Spiritus sui veritatis, Spiritus sui Consolatoris.

Nec satis est: divinus enim Redemptor in animum cujusque dolentis cupit ingredi per cor Beatissimæ Matris suæ, primitiarum et veluti culminis omnium, qui sunt redempti. Christus moriens, quasi maternitatem prosecuturus, qua, Spiritu Sancto operante, in lucem est editus, eidem Beatissimæ semper Virgini Mariæ *novam maternitatem* est largitus – eamque spiritalem et universalem –, quæ cunctos homines complecteretur, ut quisque, in fide ambulans in

terris, sibi una cum Illa, arcte conjungeretur usque ad Crucem et, Crucis vi, quivis dolor hoc modo recreatus ex infirmitate hominis in Dei virtutem mutaretur.

Huiusmodi autem processus interior non semper eodem fit modo. Sæpe difficile incipit et instauratur. Iam ipsum initium est diversum: diversus est enim animus, quo homo se gerit, cum dolore vexatur. Hoc tamen antea animadverti potest: pæne semper unumquemque ad dolorem accedere *ex ipsa sua humana natura reclamando pariterque quærendo: "Cur?"*. Quisque quærit significationem doloris et requirit responsum huic interrogationi pro humana sua condicione. Certe crebro etiam Deum de hoc interrogat et Christum. Præterea homo plane intellegit et ipsum, quem interrogat, pati eumque igitur velle *responsum sibi dare ex Cruce, ex illo veluti centro suæ passionis*. Tamen, interdum, temporis spatio opus est, etiam diuturno, ut hoc responsum intus percipi possit. Christus enim non directe neque modo abstracto respondet huic interrogationi hominis de significatione doloris. Homo vero audit responsum salvificum, quatenus paulatim ipse fit particeps Christi passionum.

Responsum, quod per huiusmodi participationem datur in interiore necessitudine cum Magistro, est simul *quiddam maius quam sola responsio abstracta rogationi* de significatione doloris. Christi enim responsio est imprimis invitatio.

Vocatio quidem est. Christus enim explicat causas doloris non modo abstracto a rebus, sed ante omnia dicit: “Sequere me”! Veni! Dolore tuo esto particeps huius operis pro mundi salute, quod per meam passionem perficitur! Per meam Crucem. Dum homo *tollit crucem suam*, spiritualiter se conjungens Christi Cruci, patefit ei significatio salvifica doloris. Homo non invenit hunc sensum, quatenus est homo, sed intra passionem Christi. Tamen simul illa significatio salvifica doloris e condicione Christi *descendit in humanam condicionem* et fit quodammodo personalis ejus responsio. Tunc homo invenit in dolore suo interiorem pacem et etiam spiritalem lætitiã.

27. De huiusmodi lætitiã loquitur Apostolus in Epistula ad Colossenses: “Nunc gaudeo in passionibus pro vobis”.⁸⁸ *Victoria de sensu inutilitatis doloris* fit fons lætitiæ, qui sensus interdum penitus insidet in humano dolore. Hic enim non solum intus hominem consumit, sed etiam videtur efficere ut homo aliis sit oneri. Homo sentit se cogi ad accipiendum auxilium et curam ab aliis et simul videtur sibi ipsi esse inutilis. Sic detectus sensus salvificus doloris una cum Christo suscepti efficit ut huiusmodi tristissimus *sensus mutetur*. Fides in participationem passionum. Christi secum fert interiorem certitudinem, juxta quam homo patiens “adimplet ea, quæ desunt passionum Christi”; id quod e ratione spiritali

⁸⁸ Col. 1, 24.

operis redemptionis *conducit*, ut Christus fieri voluit, *saluti ejus fratrum et sororum*. Non solum igitur prodest aliis, sed etiam ac quidem magis exsequitur munus, pro quo nihil potest substitui. In corpore Christi, quod continenter crescit ex Cruce Redemptoris, ipse dolor, pervasus virtute sacrificii Christi, *est pernecessarius mediator et auctor bonorum* suapte natura necessario pertinentium ad mundi salutem. Ipse potius quam quilibet aliud pandit viam Gratiae, quæ hominum animos commutat. Ipse potissimum efficit ut in humana historia virtutes redemptionis vigeant et operentur. In illa conflictatione “cosmica” inter spirituales vires boni et mali, de qua agitur in Epistula ad Ephesios,⁸⁹ hominum dolores, conjuncti cum passione redemptrice Christi, *particulari sunt adiumento viribus boni*, dum valde proficiunt victoriæ harum virium salvificarum.

Ecclesia igitur habet omnes fratres et sorores Christi, qui dolore cruciantur, veluti *subjectum multiplex divinæ suæ virtutis*. Persæpe Ecclesiæ pastores ad illos recurrunt et ab illis petunt auxilium et columen! Evangelium doloris continenter scribitur continenterque loquitur verbis, quibus res tam mira communique opinioni contraria exprimitur: divinæ fontes virtutis prosilire ex ipsa prorsus humana infirmitate. Qui Christi passionum sunt participes, servant in suis doloribus peculiarem omnino *particulam infiniti*

⁸⁹ Cfr. *Eph.* 6, 12.

thesauri redemptionis mundi, et communicare possunt cum aliis hunc thesaurum. Quo magis homini peccatum minatur, quo graviores fiunt peccati compagine, quas in se gerit mundus hodiernus, eo maius est momentum humanorum dolorum. Eo magis Ecclesia compellitur ut bonis humani doloris utatur pro mundi salute.

VII

28. In eandem rationem Evangelii doloris cadit etiam – et quidem congruenti modo – parabola boni Samaritani. Per hanc enim Christus responsum dedit interroganti: “Quis est meus proximus?”.⁹⁰ Etenim, ex tribus, qui descendebant ab Jerusalem in Jericho per viam, in qua jacebat semimortuus homo a latronibus expoliatus ac vulneratus, ipse Samaritanus se præbuit *reapse proximum* misero illi: vox proximi declarat simul illum qui mandatum caritatis erga proximum implevit. Duo alii homines eandem decurrebant viam: prior erat sacerdos, alter levita, at uterque “vidit eum et pertransiit”. Samaritanus autem, “videns eum misericordia motus est, et appropians alligavit vulnera ejus”, dein eum “duxit in stabulum et curam ejus egit”.⁹¹ Atque profecturus, prompte stabulario commisit ut viri doloribus obnoxii curam ageret, impensas necessarias se spondens soluturum.

⁹⁰ *Luc.* 10, 29.

⁹¹ *Ibid.* 10, 33-34.

Boni Samaritani parabola ad Evangelium doloris pertinet. Ostendit enim rationem, qua unusquisque nostrum prosequi debet proximum dolentem. Nobis non licet “pertransire”, negligenter, sed “consistendum” est apud eum. Bonus Samaritanus *ille est omnis homo, qui consistit ad alterius hominis dolores*, qualescumque hi sunt. Consistendi actio illa non est habenda importuna curiositas, sed animus ad opitulandum paratus. Est veluti patefactio habitus in intimo corde insidentis, qui etiam animi commoti significationem secum fert. Bonus Samaritanus est *quicumque homo aliorum doloribus percussus*, est homo “misericordia motus” proximi calamitatibus. Si Christus, qui probe novit intima hominis, ejusmodi animi motum ostendat, profecto hic ipse momentum habet ad totum nos gerendi modum respectu dolorum, quos alii patiuntur. Colenda est ergo ejusmodi sentiendi vis in corde utpote quæ erga dolentem indicet miserationis affectum. Qui quidem exstat interdum una vel præcipua caritatis nostræ nostræque cum homine male affecto conjunctionis significatio.

Tamen, Samaritanus ille in parabola a Christo enarrata non commoratur in sola animi commotione atque commiseratione: hæ illi fiunt concitamentum ad ea patranda, quæ homini sauciato sunt auxilio. Ad summam, bonus Samaritanus *ille est, qui auxiliatur dolorem toleranti*,

quæcumque est ejus natura, auxilium ferens, quoad fieri potest, efficax. In eo animi studium collocat, sed minime subsidia materialia omittit. Affirmari licet eum semet ipsum donare, proprium “ego”, idque alii aperire. Agimus hic de præcipuo anthropologiæ christianæ capite. Non potest homo “plene seipsum invenire... nisi per sincerum sui ipsius donum”.⁹² Bonus Samaritanus ille est qui *hanc ipsam sui donationem* efficere valet.

29. Parabolam evangelicam considerantes, licet inferre dolorem, qui inter homines multiformiter adsit, propterea etiam inter eos esse ut *in homine caritatem excitet*, donum scilicet ipsum sui, proprio commodo neglecto, pro aliis hominibus dolore affectis. Humanæ ægritudinis ambitus continenter quodammodo alium postulat, qui in caritate humana consistit; quodammodo dolor causa est ut homo, suæ utilitatis immemor, hoc amore in animo suo et operibus excitetur. Non licet homini “proximo” negligenter pertransire aliorum dolores videns, propter hominum necessitudinem fundamentalem, eo minus ei licet propter amorem erga proximum. Debet ille “consistere”, “animo commoveri”, ita se gerere sicut Samaritanus in parabola evangelica. Parabola ex se ipsa aperit *veritatem penitus christianam* eandemque quam maxime universe humanam. Non sine causa quidquid fit pro hominibus

⁹² *Gaudium et Spes*, 24.

dolore affectis vel auxilii egentibus, etiam in communi modo loquendi vocatur “boni Samaritani” opus.

Ejusmodi actio, sæculis volventibus, induit rationes institutionales apte dispositas atque veluti regionem operis in cujusque *professione* efficit; ut est “boni Samaritani” professio medici vel ægrorum ministræ aliudve ejusmodi! Ratione habita naturæ evangelicæ in eo insidentis, cogitamus potius de vocatione quam de munere. Instituta autem, quæ per sæculorum decursum “boni Samaritani” ministerium impleverunt, hac nostra ætate etiam magis creverunt atque speciales agendi rationes susceperunt. Quod profecto comprobatur sine ulla dubitatione ætatis nostræ homines diligentius in dies et perspicacius attingere proximi dolores, eos studere mentibus comprehendere et præcavere usque accuratius. Qua in provincia etiam major in dies fit eorum facultas atque specialis artis cognitio et exercitatio. Quæ omnia considerentes, recte dicimus evangelicam boni Samaritani parabolam factam esse *unam e præcipuis partibus culturæ moralis atque vitæ universe humanæ cultus*. Præ oculis habentes homines cunctos, qui scientia sua atque peritia multimode proximo dolore laboranti auxiliantur, facere non possumus quin in eos laudis verba proferamus animumque nostrum gratum iis testemur.

Quas voces ad omnes etiam volumus pertinere, qui, sui commodi immemores, officiis proximum dolore afflictum prosequuntur, *semet ipsos sponte impendentes in auxilium* uti “*bonus Samaritanus*”, atque tempus omne omnesque vires, quæ præter opus professionis iis suppetunt, hac in re insumunt. Voluntaria ista “boni Samaritani” navitas seu caritatis officium possunt quidem vocari socialia, appellari possunt etiam nomine *apostolatus*, quotiescumque suscipiuntur ob causas prorsus evangelicas, præsertim cum hoc fit respectu habito Ecclesiæ vel cujusvis Communitatis Christianæ. Voluntaria opera “boni Samaritani” per congruentes *ambitus* vel per *instituta* ad hunc finem condita exercetur. Magni momenti est navitas, quæ hoc modo fit, præsertim cum agitur de amplioribus muneribus suscipiendis, expetentibus sociatam operam et instrumentorum technicorum usum. Nec minoris pretii est etiam actio unius cujusvis, maxime cum fit a personis, quæ procliviores sunt ad varia humanæ ægritudinis genera, quibus auxilium ferre possunt tantum singuli et quidem personaliter. Adjutorium dein *familiale* significat sive caritatis officia erga proximum exhibita ejusdem familiæ membris sive familiarum mutuuum adjutorium.

Difficile est enumerare hic omnes formas variosque ambitus actionis “boni Samaritani” propriæ, quæ in Ecclesia et in humana sunt societate. Agnoscendum est profecto ea plurima

esse, atque insimul gaudium significandum quod per ea *primarii valores morales*, veluti valor necessitudinis conjunctionisque inter homines, amoris christiani erga proximum, efficiunt imaginem vitæ socialis et rationum, inter homines intercedentium, dum hac in re variis formis odii, violentiæ, crudelitatis, contemptus hominis, vel solum “neglegentiæ proximi”, id est animi indifferentis circa eum ejusque dolores, repugnatur.

Permagna est hoc loco *vis agendi rationum in educatione adhibendarum*. Familia, schola, cetera instituta ad animos formandos pertinentia, etiam ob causas tantum humanas, perseveranter debent anniti ut illam animi lenitatem erga proximum ejusque dolorem excitent et foveant, cujus Samaritanus ille evangelicus factus est imago. Idem hoc, ut par est, atque etiam penitus usque – quoad fieri potest – Ecclesiæ est peragendum, altius pervestigando causas, quas Christus parabola illa totoque Evangelio est complexus. Parabolæ boni Samaritani evidens pondus, sicut et totius Evangelii, hoc est: homo oportet sentiat *se vocari ut, quasi primas partes agens*, in dolore caritatis testimonium perhibeat. Instituta sunt quidem magni momenti atque pernecessaria; attamen nullum institutum ut tale substitui potest pro corde humano, pro animo humano, cum occurrendum est alterius dolori. Hoc spectat quidem ad corporis dolores, sed etiam plus est ei

tribuendum, cum agitur de doloribus moralibus et maxime cum animus dolore afficitur.

30. Parabola boni Samaritani, quæ, ut dictum est, pertinet ad Evangelium doloris, una cum eo, historiam Ecclesiæ atque Christianismi et historiam hominis hominumque generis pervadit. Testatur revelationem, a Christo factam, significationis salvificæ doloris *nullo modo idem esse ac socordiam*. Prorsus contrarium est dicendum. Evangelium adversatur socordiæ respectu doloris. Christus ipse hac in re est potissimum agens. Hoc sane modo ille consilium messianicum missionis suæ exsequitur, juxta prophetæ verba: “Spiritus Domini super me; propter quod unxit me evangelizare pauperibus, misit me prædicare captivis remissionem et cæcis visum, dimittere confractos in remissione, prædicare annum Domini acceptum”.⁹³ Christus *hoc consilium messianicum* missionis suæ quam diligentissime perficit: pertransit “benefaciendo”,⁹⁴ ejusque operum benefica munera maxime eminent humano relevando dolore. Boni Samaritani parabola plane congruit cum agendi ratione Christi ipsius.

Hæc parabola demum, ob primarii argumenti sui naturam, in extremi judicii verbis animum perturbantibus continetur, quæ Matthæus in suo Evangelio rettulit: “Venite, benedicti Patris mei;

⁹³ *Luc.* 4, 18-19; cfr. *Is.* 61, 1-2.

⁹⁴ *Act.* 10, 38.

possidete paratum vobis regnum a constitutione mundi. Esurivi enim, et dedistis mihi manducare; sitivi, et dedistis mihi bibere: hospes eram et collegistis me; nudus, et operuistis me; infirmus, et visitastis me; in carcere eram, et venistis ad me”.⁹⁵ justis petentibus quandonam erga eum hæc omnia patnaverint, Filius Hominis respondebit: “Amen dico vobis: *quamdiu fecistis uni de his fratribus meis minimis, mihi fecistis*”.⁹⁶ Sententia opposita erit iis qui aliter se gesserunt: “Quamdiu non fecistis uni de minimis his, nec mihi fecistis”.⁹⁷

Potest profecto longior fieri index dolorum, qui humanam sentiendi vim excitaverunt, commiserationem, opitulationem aut his caruerunt. Prima et secunda pars declarationis Christi circa iudicium extremum, relictis ambiguitatibus, palam testantur quanti momenti sit, si spectatur ad uniuscujusque hominis vitam æternam, illud “consistere”, sicut Samaritanus fecit, ad proximi dolorem, hunc “commiserari” et demum ei auxiliari. In Christi consilio messianico, quod simul exstat *Regni Dei consilium*, ægritudo adest in mundo ut excitet caritatem, ut pariat opera caritatis in proximum, ut humanitatis cultum in “caritatis humanitatem” convertat. Hac in caritate doloris significatio salvifica perficitur

⁹⁵ *Matth.* 25, 34-36.

⁹⁶ *Ibid.* 25, 40.

⁹⁷ *Ibid.* 25, 45.

plene atque amplitudinem ultimam attingit. Christi verba in extremo iudicio hæc omnia explanant prorsus simplicitate ac perspicuitate Evangelii.

Verba hæc de caritate, de caritatis actibus cum humano dolore conjunctis, etiam atque etiam nobis revelant ipsam Christi *passionem redemptricem*, prout omnibus *humanis doloribus* subsit. Christus dicit: “Mihi fecistis”. Ipse est, qui in unoquoque caritatem experitur; ipse qui auxilium accipit, cum hoc cuique laboranti fertur, nullo facto discrimine. Ipse adest in eo qui dolet, quia dolor ejus salvificus semel in perpetuum dilatatus est ad quemlibet dolorem humanum. Omnes vero, qui patiuntur, semel in perpetuum impelluntur ut communicent “Christi passionibus”.⁹⁸ Eodem modo omnes adiguntur ut “adimpleant” suis doloribus “ea, quæ desunt passionum Christi”.⁹⁹ Christus simul docuit homines *benefacere ope doloris* atque *benefacere ei qui dolet*. Hac duplici ratione nobis penitus aperuit significationem doloris.

VIII

31. Hæc profecto est doloris significatio, re vera supernaturalis simulque humana. Est *supernaturalis*, quia insidet in mysterio divino redemptionis mundi; simul autem plene *humana*,

⁹⁸ 1 *Petr.* 4, 13.

⁹⁹ *Col.* 1, 24.

quia homo in eo se ipsum invenit, suam humanitatem, suam dignitatem, suam missionem.

Dolor absque dubio pertinet ad mysterium hominis. Fieri potest ut dolor non obvolvatur hoc mysterio, quod est singulariter impenetrabile, sicut homo ipse. Concilium Vaticanum II hanc veritatem enuntiavit: “Reapse nonnisi in mysterio Verbi incarnati mysterium hominis vere clarescit. ... enim ... *Christus*, novissimus Adam, in ipsa revelatione mysterii Patris Eiusque amoris, *hominem ipsi homini plene manifestat* eique altissimam eius vocationem patefacit”.¹⁰⁰ Si verba hæc referuntur ad ea omnia, quæ ad mysterium hominis pertinent, tunc certe ea peculiari modo ad *humanum dolorem* referuntur. Hac ipsa in re *omnino necessarium* est ut “homo homini manifestetur eique altissima ejus vocatio patefiat”. Evenit etiam – sicut experientia comprobat – ut hæc evadant *insigniter difficilia*. Cum vero eadem plene perficiuntur atque humanæ vitæ lumen redduntur, tunc singularem afferunt *beatitatem*. “Per Christum et in Christo... illuminatur ænigma doloris et mortis”.¹⁰¹

Finem facimus harum considerationum doloris eo ipso anno, quo Ecclesia jubilæum extraordinarium recolit ad anniversariam memoriam peractæ redemptionis pertinens.

¹⁰⁰ *Gaudium et Spes*, 22.

¹⁰¹ *Gaudium et Spes*, 22.

Mysterium redemptionis humanæ mirum quidem in modum *insidet in dolore*, atque hic vicissim ad illud altissima ratione refertur.

Optamus sane hunc Redemptionis Annum arctissime conjuncti cum iis omnibus, qui dolore afficiuntur, peragere. Oportet ergo sub Calvariæ Crucem cogitatione ac mente convenient omnes dolentes, qui in Christum credunt, præsertim qui fidei causa in Eum cruci affixum et Resuscitatum vexantur, ut eorum dolorum oblatio appropere impletionem rogationis ipsius Salvatoris ut omnes in unitate constituentur.¹⁰² Eodem etiam convenient homines bonæ voluntatis, quia in Cruce est “Redemptor hominis”, Vir dolorum, qui in se excepit corporis et animi dolores hominum per cuncta tempora ut *in amore* significationem salvificam dolorum suorum deprehendere valerent necnon responsiones certas omnibus interrogationibus, quas ponunt.

Una cum Maria, Christi Matre, quæ stabat *juxta Crucem*,¹⁰³ consistimus, omnes veluti cruces hominum, qui nunc sunt, intuentes.

Sanctos universos, qui per sæculorum decursum peculiari modo dolorum Christi fuerunt participes, invocamus. Ab iis petimus ut nos sustineant.

Vos omnes, qui *doloribus excruciamini*, rogamus ut nos sustineatis. Vos ipsos precamur, qui estis

¹⁰² Cfr. *Io.* 17, 11. 21-22.

¹⁰³ Cfr. *ibid.* 19, 25.

infirmi, ut *efficiamini* quasi quidam *virtutis fons* pro Ecclesia et hominum genere. In asperrimo luctamine inter bonum et malum, cujus ætas hæc nostra est veluti theatrum, dolor vester, junctus cum Christi Cruce, vincat.

Vobis omnibus, Fratres ac dilecti Filii, Apostolicam nostram Benedictionem impertimus.

Datum Romæ, apud Sanctum Petrum, die XI mensis Februarii, in memoria Beatæ Mariæ Virginis de Lourdes, anno MCMLXXXIV, Pontificatus nostri sexto.

JOANNES PAULUS PP. II